

LA QUOTIDIANA

FMR Fundaziun Medias Rumantschas, Via da Masans 2, 7000 Cuirra, 081 544 89 11, redacziun@fmr.ch



Cumià da Züllig

A chaschun da la radunanza da delegads ha Hotellerie Suisse prendì cumià dad Andreas Züllig ed elegì in nov president.

Pagina 2



Petta Pagada prepara in disc

En il mument na dat la band Petta Pagada nagins concerts. Ils tschintg musicists sa preparan per edir in disc.

Pagina 7

FMR FUNDAZIUN
| MEDIAS
RUMANTSCHAS

südostschweiz

SURSELVA

Glion sto sedustar

La vischnaunca da Glion ei confruntada cun in preventiv pauc confortabel. Avon in meins ha la suprastanza communal approbau las cefras quintadas digl onn 2024. Tier expensas da 35 386 900 ed ed entradas da 34 265 500 francs duei seresultar in deficit da 1 121 400 francs. Ina carga nunspitgada ei la cum-part dil deficit dil Spital regiunal Surselva. Sco tschellas vischnauncas sursilvanas ei Ilanz/Glion acziunaria dalla SA. Ella sto purtar 1,26 milliuns francs da totalmeins 5 852 000 francs. Il deficit dil spital sursilvan ei in da sis puncts che la suprastanza communal menziuna specialmeins el messadi per mauns dil parlament communal. Quel s'entaupa mesjamna proxima per tractar las cefras cotschnas previdas. Ina cumissiu parlamentara ha giu envesta el preventiv 2024. Malgrad surpli d'expensas sa la vischnaunca ni negligir ni snegar investiziuns urgentas e necessarias. (fmr/abc)

Pagina 5

VAL MÜSTAIR

Üna chasa plain istorgia e legendas



Che es propi istoric vi da la Chasa Chalavaina a Müstair? FOTO MAD

La Chasa Chalavaina, la pensiu sper la clostra a Müstair, es gnüda undrada ils 13 da november sco «Hotel istoric da l'on 2024» in Svizra. Id es pelvaira ün albiert cun üna lung'istorgia chi va inavo fin almain i'l 13avel tschientiner. Ma intuorn quist chasamaint daja eir istorgettas chi sun daplü legenda co fat istoric. Uschè scriva per exaimpel eir la comunicaziun uffiziala in connex culla distincziun actuala: «Mit der 1254 erstmals als Herberge erwähnten Chasa Chalavaina würdigt die Auszeichnung «Historisches Hotel des Jahres 2024» (...) einen der ältesten Gasthöfe des Landes.» Ed i vain eir manzunà cha Benedict Fontana haja preparà giò da la lobia da la Chasa Chalavaina ils sudats pella gronda battaglia dal 1499. – Però es quai istoricamain correct? Es l'eroe grischun Benedict Fontana propi stat illa Chasa Chalavaina? E daja ün documaint chi attestescha la prüma jada l'albiert i'l 13avel tschientiner? – La FMR s'ha missa in tschercha da stizis istorics ed ha badà: Tuot quai chi vain comunichà nun es istoricamain documentà. (fmr/dat)

Pagina 11

GRISCHUN CENTRAL

Carriera speziala

Sen Instagram ò ella passa 280 000 followers – Martina Bisaz da Latsch. Cun igl nom «Kitkat_ch» gudogna ella sen sen social media, pia Instagram – igl sies pang da mintgade. Per differentas firmas scu per exaimpel IKEA, Samsung u igl turissem Val Surses tschertga ella motivs, fotografescha e postescha e fò uschia reclama. Aint igl discurs cun la FMR rachinta ella scu tgi vign tar talas collaboraziuns resp. scu tg'è pussebel da gudagner daners via Instagram. Ed ella rachinta dalla sia «carriera» betg planisada aint igl mond digital. En pass tg'ella ò fatg igl onn 2016 e tg'ella n'è anfignen oz mai s'anriclada. (fmr/sab)

Pagina 9

In pledoyer da l'iniziant

Avant bun in mais ha Bernard Cathomas, l'antierur secretari da la Lia Rumantscha ed antierur directur dad RTR publictà in pledoyer per il rumantsch grischun. Sco in dals iniziants da la lingua da standard resumescha el il svilup da la lingua ils ultims 40 onns.

SANDRO BUCHLI/FMR

Bernard Cathomas è stà secretari general da la Lia Rumantscha ed ha inizià en ils onns 1980 il rumantsch grischun (rg) sco lingua da scritura che tut ils Rumantschs e las Rumantschas chapeschan. En ses nov cudesch ch'è cumpari avant radund in mais «Ein Weg zur Einheit in der Vielfalt» tematisescha el il svilup dal rg ils ultims 40 onns e mussa las sfidas, ils success e las sconfittas da la lingua da standard. Il cudesch mussa la perspectiva dad in «insider» or

d'emprim maun ed è ina basa per reflectar davart il futur da la lingua rumantscha insumma.

In svilup «emoziunal»

L'onn 1982 ha il linguist da Turitg Heinrich Schmid (1921–1999) stgaffi sin incumbensa la lingua unitara rumantsch grischun. Quella sa cumpona da tut ils tschintg idioms ed è suenter sia creaziun vegnida duvrada en differentas domenas da la vita publica. Ina finamira principala dal rg era d'auzar la visibilitad dal rumantsch, cunquai ch'i aveva savens num:

Ubain be in rumantsch, u lura direct tudestg, uschia Bernard Cathomas.

Sper success era sconfittas

L'acceptanza dal rg sco lingua uffiziala da la Confederaziun e dal chantun ha garantì al rumantsch ina ferma segirezza giuridica, uschia Bernard Cathomas en il cudesch. Main ferma è l'acceptanza dal rg stada tar il diever sco lingua da scola. La FMR ha dà ina lectura critica da la nov'ovra da Bernard Cathomas.

Pagina 3

«Latsch è per persungas schi introverteidas scu ia simplamaintg perfetg.»

Martina Bisaz, la «instagramra» da Latsch, dat invista en ses mund da social media. – Pagina 9



Luvrau pigl advent

Per la sisavla ga organischescha il Chor mischedau Surrein dumengia proxima sia fiera d'advent en casa da scola a Surrein. La purschida da quei di ei il resultat da rondund 550 uras da lavur las jamnas vargadas. Commembras e commembers dil chor, mo era confamiliars ed auters vischins interessai han fatg tustgets, formau vasas ord arschella e zambergiau 'ials. Leutier porscha il chor dumengia sur miezdi e suenter miezdi bunas buccadas pils maguns fomentai. Il Chor mischedau Surrein dumbra 30 cantaduras e cantadurs activs. «Legreivlamein havein nus giu in augment da commembras e commembers activs ils davos onns», di Beat Candinas che presidescha il chor dapi siat onns. Aschia ein da veser ellas retschas dil chor entginas fatschas giuvnas. La fiera d'advent da dumengia proxima duei buca mo dar la caschun da cumprar in artechel ni l'auter, mobein era da s'entupar. La davosa fiera d'advent dil chor ha giu liug 2019. (fmr/hh)

Pagina 5



50047



Servetsch d'abunents e da
distribuziun: tel. 0844 226 226
mail: abo@somedia.ch

9 771424 749004